

東
華
續
錄

東華續錄

同治六十六

臣王先謙敬編

臣張式恭恭校

九月辛亥朔諭軍機大臣等劉長佑奏餘匪被剿回竄暨遵飭劉景芳專備北路各摺片賊匪經各軍分路攔擊乘閒東竄意欲勾結青滄匪徒以圖復逞被各軍截回奔向西南劉長佑見飭余承恩等跟蹤追剿著卽嚴飭實力截擊毋任紛竄此股匪徒前經該督奏稱僅餘百餘人復據穆騰阿奏稱連次殲斃所餘無幾是見存匪類不過漏網餘生亟應趕緊兜截迅速殄除此次賊竄何處餘匪若干並著劉長佑查明具奏劉景芳一軍旣經劉長佑飭令駐文安雄縣等處專備北路歸穆騰阿節制調遣卽著該都統檄令該總兵會同京營各軍嚴爲戒備遇有賊匪北竄卽著迎頭截

擊至賊匪潛匿處所地方官往往諱飾不肯認真查辦深堪痛恨
劉長佑俟大股賊匪辦竣後卽嚴飭各州縣遇有此股內餘匪潛
藏卽行嚴密查拏以絕延蔓其查拏不力及防範不嚴之地方官
卽行分別參辦以儆頹靡將此由四百里各諭令知之○諭文麟
奏糧催辦不齊擬分兩起出關一摺文麟帶兵出關前赴哈密
所需行糧等項諸形缺乏該辦事大臣已由撫彝高臺趕辦白麪
三萬斤錢一千餘串派副將蕭青雲先帶中右各營出關進駐玉
門飛催署甘涼道崇福趕運行糧再由撫彝高臺設法籌措並籌
辦餉項若干卽於七月初六日親自拔營前進哈密地方瘠苦必
須裹糧而行文麟見飭撫彝等處趕爲設措惟恐不敷應用卽著
左宗棠穆圖善迅飭安西敦煌玉門三州縣趕緊協濟行糧餉項
俾利遄行成祿進攻肅州日久未下以致稽延時日著卽趕緊激

勵兵勇迅圖攻克剋日帶兵出關與文麟所部聯絡進紮以壯聲威不得仍前延玩致干重咎景廉是否業已啟程前進並著穆圖善飭令迅赴哈密新任不准逗留其籌辦文麟糧餉官紳准由該辦事大臣咨明穆圖善擇尤請獎將此由六百里各諭令知之○子直隸陣亡參將趙友勝等祭葬世職○壬子諭軍機大臣等左宗棠等奏官軍剿擒獲勝擒逆復渡涇東竄甯條梁鎮被賊陷踞米脂亦有賊蹤並請將田興恕易名帶隊各摺片擒逆由渭南屬境於七月二十三至八月初六等日竄擾臨潼等處旋竄咸陽乘夜冒雨疾馳分由臨涇一帶渡涇而東該省大雨連旬未能剋期進剿著左宗棠等俟晴霽後督率各軍會籌剿辦迅殄逆氛靖邊縣屬之甯條梁鎮被陷及米脂被擾情形前據裕瑞等奏報與左宗棠所奏大略相同著左宗棠懷遵前旨會商庫克吉泰喬松年

迅卽撥兵力圖掃蕩左宗棠以邊外要地未及先事綢繆致被賊陷自請交部議處之處著加恩寬免延榆綏道嵩壽稟報遲延全無籌畫延榆綏鎮總兵陶茂森帶兵剿賊徒託空言又不能扼賊來路均著摘去翎頂以儆玩泄田興恕在黔時劣款前據毛鴻賓華祝三先後奏參經駱秉章查明吸食洋藥荒淫無度不以剿賊爲事信任劣員濫保匪人妄戮無辜拆毀民房營建第宅均屬實情似此劣蹟昭著本屬罪不容誅朝廷因其有殺害教民之案事關中外交涉委曲加恩從輕發遣新疆以重國體而顧大局乃該革員於發遣後疊次報病延不到戍如果抱病屬實則孱弱之軀何能剿賊若飾詞捏報居心尤不可問左宗棠請將田興恕易名帶隊之處著毋庸議將此由六百里諭知左宗棠庫克吉泰喬松年並傳諭劉典知之○申諭各省嚴拏哥老會匪○允左宗棠調

前甘肅提督曹克忠赴陝助剿○予陝西陣亡參將賀羣其等祭葬世職○癸丑諭軍機大臣等李鶴年奏宋慶回軍顧運及各路防剿情形一摺逆蹤竄出膠防後宋慶追賊至郟復經李鴻章飭令回紮東平原派地段以顧運防見在該逆疊撲劉老澗並窺伺宿遷運河均經擊退若不乘閒北趨勢必西竄豫境著李鶴年督飭張曜宋慶等軍將東平汶上一帶嚴密設防一面酌派精銳於永城夏邑等處慎固封守以杜賊由徐州蕭碭西竄之路毋任竄入豫疆又形滋蔓直隸梟匪雖所餘僅百餘人而蹤迹飄忽烏合易集陝西捻匪由臨涇一帶渡涇而東該省各路防軍均當勤探嚴防不得以賊蹤尙遠稍涉大意如何路有急卽著該撫調撥兵勇親督出省馳往策應毋稍疏虞本日據御史盧士杰奏河南頻歲荒旱民力已憊近復有安徽委員潛赴光州要結劣紳藉官漁

利於固始之蔣家集往流集相去不遠添設二卡任意抽釐並攜帶空白執照沿門科派等語著李鶴年查明該委員是否奉有皖撫札委如實係病民卽著咨明裁撤儻或私行設卡騷擾閭閻卽著從嚴參辦原片著鈔給閱看將此由五百里諭令知之○乙卯子貴州陣亡州判王作賓祭葬世職○丙辰諭軍機大臣等英翰奏皖軍擊退捻股河防解嚴賊蹤西竄見派征軍入東會剿一摺捻股因未能搶渡運河悉殲於順河集一帶經黃秉鈞等設伏夾攻將河東賊館悉數埽平該逆分竄車路口張家圩等處復經各路官軍攔擊斬馘甚多賊向沂境奔竄運防業已解嚴英翰見擬將征軍兩月糧餉銀兩湊齊派令方長華赴東會剿皖營各統領官就近歸李鴻章調遣所籌各節深合機宜覽奏實堪嘉尙著英翰嚴檄黃秉鈞等軍乘此聲威痛加剿洗並飭方長華趕緊前進

會同程文炳聯絡淮東各軍覘賊所向跟蹤夾擊以竟全功此次賊竄沂境與淮東各營相距非遠李鴻章膺統帥重任自應力籌全局分撥將士迅殄逆氛何以於皖軍擊賊之時並未聞該大臣派出一軍乘機要截其追剿之銘鼎等軍亦未聞獲一勝捷該大臣所帶兵勇不下數萬捻逆鼠出濰河已經一月南則邳宿贛沭北則蘭郯任賊縱橫如入無人之境該大臣以剿賊自任初不料其觀望遷延一至於此卽著催調勁軍會東皖將士奮力攻剿毋得株守運河頓兵不進儻竟因循致誤使東皖等省又遭蹂躪是該大臣自取咎戾朝廷亦難爲之曲原也又據丁寶楨奏捻逆由邳州溝上回竄郯城經王正起一軍渡沂迎擊該逆又向贛榆海沭一帶竄逸等語該撫所部見回沂州等處正可相機躡剿著卽督飭王正起等會同李鴻章英翰派出各軍先截後追兩面兜剿

務將此股就地殲除毋任旁竄將此由六百里各諭令知之○諭
劉嶽昭奏滇省軍情喫重已飭藩司岑毓英回軍相機辦理等語
前據宋延春奏稱馬如龍進兵迤西士卒損折甚眾杜逆遣死黨
出撲馬如龍已將圍攻姚州鎮南之軍全行撤退回省就醫停兵
待餉與劉嶽昭所奏大略相同目前楚雄危急省城戒嚴馬如龍
坐視會垣無論其居心何若固已力不能支劉嶽昭飭令岑毓英
旋軍防範自屬正辦惟岑毓英與馬如龍積不相能劉嶽昭前奏
已曾言及故有仍飭回駐曲靖之議見令回省則該兩軍強弱雖
殊主客異勢猜嫌易啟難保不別滋事端宋延春素無威望恐難
駕馭得宜劉嶽昭如能迅速赴滇卽著趨程抵省妥爲調度儻黔
中軍事一時未克脫身或將馬如龍檄調隨營或酌量何路需兵
將該署提督調往總須不動聲色消患無形方爲妥善大理賊勢

彼猖尤不可聽其肆虐馬如龍離省後岑毓英一軍即可乘勝進
取若令同處一方誠恐外患方殷內憂彌切該撫務當熟審機宜
斟酌妥辦迅速具奏將此由六百里諭令知之○丁巳諭軍機大
臣等穆圖善奏河狄西甯各路回眾投誠大概情形並安插南八
營降回及靖邊縣城失守各摺片甘肅河狄二州回眾最爲強悍
近因米拉溝等處之捷該回眾震懾軍威具稟求撫而西甯洮河
等處均有可乘之機穆圖善擬派員先赴河狄責以獻城繳械各
條刻示曉諭再行分咨西甯辦事大臣等將米拉溝等處相機辦
理惟回眾旋撫旋叛性情殊難揣度穆圖善務飭所派之員乘機
開導如該回眾真心悔罪不防予以自新隨時妥爲防範其西甯
一路亦著會商辦理總之受降非易萬不可因其勢窮乞憐遂致
掉以輕心轉爲奸謀所誤馬生彥等股仍當善事羈縻毋稍大意

至南八營李得倉各部之十六萬人據稱見皆乞降可以擇地安插但該股人數過多蕭河城附近處所可否令其居住就近墾種之處卽著飭令張瑞珍前往妥辦諭知該回眾繳清軍械馬匹以消亂萌靜甯州一帶並著檄飭王得勝督率數營嚴爲控馭陝西甯條梁地方突經回匪竄踞實爲陝甘巨患該署督當懷遵前次諭旨嚴飭敦奇祥阿等會同陝省各軍迅圖收復毋任蔓延將此由六百里諭令知之○撥四川倉糧四萬石爲甘肅甯夏軍食○戊午丁寶楨奏李鴻章覆陳膠萊河失事情形倒置是非敬爲皇上陳之查六月初五日臣在平度營次接到李鴻章函稱辦理膠萊河防業已奏明欲令東軍會合辦理潘鼎新亦於是日到平度與臣言之其時賊在卽墨勢將由南路竄逸臣以必先遏賊東去乃可議辦膠防當卽督帶常武十一營親往膠萊河攔截該逆

幸卽折竄潘鼎新初議本以東軍專守北路以顧省垣大道淮軍專守南路以便解送餉銀軍火十四日臣督軍馳至高密忽接潘鼎新來函已在北路駐守修築隄牆屬臣改守南路維時各路獲匪訊俱皆稱逆計欲往青口圖由南路竄逸臣卽以十一營回駐南路是時南路朝夕岌岌實不暇兼顧北路之事迨後潘鼎新函稱濰西一路須撥兩三營助守臣卽派王心安四營前往潘鼎新派守辛安莊三十餘里之地王心安來稟以地段過長兵力不足臣勉其竭力暫顧不日豫軍一到潘鼎新等必另有布置乃宋慶以十二營先到北路仍未分置一營潘鼎新又復來函仍稱濰西空虛請以王成謙十營助之而仍撥王心安四營南回是時王永勝開字一軍計日可到本臣俾守北路劉銘傳遣人來言以王永勝新來未便令其築牆祇可將東軍已成之牆讓出俾令接守以

東軍騰中營協守濰西臣卽令王成謙遵辦王成謙亦力顧大局願往協以乃王永勝於七月初十日到膠又以王成謙所守地段太長不肯接防其時王成謙見南路較鬆北路喫緊亟欲往助乃力勸王永勝換防遲至十二日晚始肯接防王成謙卽於十三日五鼓冒雨北行臣初屬以北路地勢必須細查明確以便函致李鴻章籌兵布置迨王成謙查明地勢見濰西急須添兵一面稟報李鴻章一面於十七日與王心安換防以八營防守三十里之地以兩營守六里淺狹無牆之地潘鼎新王成謙以南路稍鬆商令王心安助守魚里鋪海神廟一段王心安尙未築牆及其力戰之際王成謙所守牆外亦見騎賊向來防守之事分定汛地各有責成原難責其分隊救援且王成謙已刻得信卽帶親軍馬步四百餘名馳往策應甫出營門過河之賊業已磨至卽與接仗二時

之久該軍亦有傷亡弁勇數十名是王成謙尙無畏蒞之情王心安曾向潘鼎新三次告急並未出隊援救逆匪竄逸本非王心安汛地王心安以二千人守無牆地段十五里又分出千人血戰海神廟以北營哨勇丁傷亡六七百人之多王心安自以四十餘騎三次衝賊僅與一騎同出是其孤軍被陷實有可憫之情且王心安平日治軍素得勇心亦並無剋扣餉銀之事諭旨飭臣派員接統其眾自應欽遵辦理惟當堵剿喫緊之際勇營驟易生手恐難得力臣深知王心安奮勇可用不得不仰懇 鴻慈仍准畱營效力暫緩派員接統其眾將來遇賊臣保王心安必能竭力圖報仍請簡派大員來東將臣與王成謙王心安等辦理事件逐一清查如臣所陳有一字欺飾願聽重議 上諭軍機大臣等前因王心安失守運河隄牆厥罪較重復不能扼賊濰西特經密諭李鴻章

將該革員正以肅軍律嗣據李鴻章奏請將該革員量從末減復經密諭李鴻章等仍遵旨辦理茲據丁寶楨奏稱李鴻章徇私諉咎倒置是非請派重臣赴東確查一摺膠萊河防之隳本誤於潘鼎新前降諭旨甚明無須丁寶楨置辯王心安之罪重在失守運牆該革員既知誓死圖報且能歷次血戰殺賊著暫行畱營帶兵勦賊以觀後效如再不知奮勉卽著丁寶楨一面奏聞一面將王心安卽行正法此時勦捻正在喫緊之時若派六員馳赴東省查辦此案必須將各該營員等紛然提訊轉於軍務有礙著暫緩派員往查李鴻章丁寶楨等於勦捕事宜並不合力同心和衷共濟輒各懷私見聽信所屬將領虛詞互諉實屬不顧大局此時朝廷專以軍務緊要姑且從緩處治儻再蹈從前惡習致誤事機孰是孰非朝廷自有權衡無待該大臣等互相爭辯也昨據英翰

奏陳皖軍在順河集擊退捻匪情形劉銘傳潘鼎新軍及東省各軍何以並未緊追互相夾擊其爲意存忌刻縱賊誤事已可概見見在賊竄沂郡銘鼎兩軍業已躡賊之後著李鴻章嚴督該營將士認真追剿不得有名無實再干罪戾丁寶楨亦當飭令東軍會剿不得擁兵坐視淮軍經過東境丁寶楨當懍遵前諭飭令該地方官豫備糧草接濟亦不得強分畛域致誤戎機至皖軍防守汛地遇有捻股撲犯時李鴻章當豫飭淮營諸將迅速援應不准各懷意見觀望遷延致誤全局丁寶楨另片奏沂水土匪梟匪勾結滋事等情著該撫卽督飭帶往各軍乘此股初起之時迅速撲滅以靖內患毋任日久蔓延致成不了之局將此由六百里各諭令知之○庚申停山東本年例貢果品○辛酉諭軍機大臣等前據麟興等奏籌辦安插厄魯特游牧事宜續又據棍噶札勒參奏帶

兵西進剿逆獲勝伊犁情形請撥馬匹箭枝土爾扈特等捐輸剿賊請獎李雲麟奏安置厄魯特無須會議安插游牧善後事宜擬赴歸化城就醫各摺片並軍機大臣呈遞棍噶札勒參請領令箭軍需則例咨文先後降旨令惇親王等會議具奏茲據奏稱李雲麟於安插厄魯特事宜一面奏聞一面移咨該喇嘛照辦似已確有把握請責成該員等妥爲籌度等語該游牧見在情形既據李雲麟奏稱業已得有牲畜又貪額爾濟斯河水草在彼安插游牧雖逐之亦不肯去自不能不照該署參贊所擬因勢利導著李雲麟與將所籌厄魯特土爾扈特各旗游牧事宜認真辦理務須計出萬全將棍噶札勒參妥爲駕馭俾爲我用毋得敷衍了事致貽後患其請照西甯例歲賜該喇嘛採買茶布銀兩一節雖據該王大臣等奏稱俟該處辦事大臣簡放有人再行酌辦而該喇嘛

報效情殷不可不量加體恤未經定議之先仍照李雲麟等所擬由新疆餉銀項下從本年冬季起按季撥銀三千兩暫資接濟綠營回子等既能出力殺賊著卽傳知棍噶札勒參督率該回子奮勉圖報如能續行立功不妨隨時鼓勵惟該差官等所稱綠營回子出力剿賊其事是否真實其心迹是否相符亦不可不詳細察度總以不誤事機爲要策林喇布坦拉特那巴咱爾均著加恩卽行開復其圖布新克西克從前兵潰時如該員有應得之罪著李雲麟等查明奏請開復如無應得之罪仍著另行請獎其餘各員著理藩院酌量辦理棍噶札勒參請撥箭枝令箭及軍需則例戰箭一萬枝已令武備院如數撥給所需火箭已令火器營及山西巡撫酌量撥解軍需則例卽著由戶部頒給其令箭一項卽傳知該喇嘛自行辦理仍應先行呈明烏里雅蘇台將軍存案備查以

資應用李雲麟於安插厄魯特事宜首先倡議自應始終其事乃甫經籌辦遽以抱病爲辭布翼置身事外迹涉規避取巧且不候諭旨擅赴歸化尤屬不成事體所請赴歸化城就醫之處著不准行無論行抵何處卽行折回會同麟興妥辦其應行傳知棍噶札勒參各節著李雲麟等摘錄諭旨傳知該喇嘛欽遵籌辦摺片二件著鈔給李雲麟興閱看將此由六百里各諭令知之○諭喬松年奏甯條梁失守自請議處一摺甯條梁地方被賊攻陷該處駐紮之敦奇祥阿等軍尙無下落賊勢猖獗必須迅速剿辦方免蔓延左宗棠前派之劉厚基一軍著卽催令刻期進剿毋稍遲誤敦奇祥阿等營有無潰退情事及穆圖善加派之托雲佈馬隊曾否與賊接仗著左宗棠穆圖善等查明具奏該督等當飭在事員弁認真兜擊迅殄逆氛米脂縣城是否解圍何以喬松年尙未奏

及仍著左宗棠等懷遵前旨撥兵會剿立解城圍喬松年於甯條
梁失陷未能先事豫防實屬疏忽著交部議處甯條梁毗連晉邊
河曲保德一帶趙長齡當加意防範飭令陳湜將河防嚴密布置
毋稍大意棍噶札勒參帶兵西進請調火箭萬枝等語棍噶札勒
參赴新疆剿賊已至吐木爾綽爾胡一帶與賊接仗缺少火箭著
趙長齡酌量撥給解赴該喇嘛軍營以資攻剿將此由五百里諭
知左宗棠庫克吉泰穆圖善喬松年趙長齡並傳諭陳湜知之○
諭兆琛奏三路官軍接獲勝仗並攻克招撫河西各寨情形一摺
貴州寨頭苗逆環攻官軍前敵各營經總兵黎得盛等擊敗後分
擾邛城青谿均被剿逃竄該逆糾同教匪攻撲餘慶縣城兆琛派
令龍武軍前往救援守備敖祿魁等突圍入城人心鎮定李元度
所部在一盪水地方獲勝並攻克萬福聖等處賊寨該逆勢蹙乞

降繳械薙髮河西九寨悉平其二十九寨亦皆就撫周洪印一軍因賊由思州竄偏晃州派員迎剿追至思屬之白果寨其天柱土匪亦經分軍扼擊沿河已無賊蹤粵匪竄至黎平靖州等處周洪印派戈鑑等會合團丁直擣賊巢將木城斫倒該逆眾向廣西高洋奔竄黎平南路肅清楚黔各邊苗教充斥此次官軍三路獲勝正可乘此聲威痛加剿洗著兆琛督率所部並分飭李元度周洪印兩軍確探賊蹤分投剿擊毋得稍形鬆懈致棄前功曾璧光亦當嚴飭黎平靖州各府州縣加意防範與楚軍遙爲應援以牽賊勢晃州各地方接近黔界劉崐務飭在防將士相機扼守毋涉疏虞席寶田接辦黔事此時在永州一帶招集舊部著劉崐催令該臬司趕緊招募成軍剋期前進接辦援黔軍務不可再事耽延將此由五百里諭知劉崐曾璧光並傳諭兆琛知之○予陝西陣亡

知縣曹德元貴州陣亡遊擊鄒逢元等祭葬世職並追予陣亡總兵官桂林建祠○壬戌諭軍機大臣等劉長佑奏餘匪乘閒南遁請與鎮將一併議處並請將臺城等縣地方官先行交議丁寶楨奏擊散沂水匪徒各摺片直隸殘匪數僅百餘余承恩劉景芳等兵力較厚於該匪竄至邳州蠡縣時均未能追擊迎剿以致賊由西路突出竄入武邑衡水地方辦理實屬疲玩劉長佑督剿此股日久未能蕆事僅以憂慙悚慚等詞空言敷衍於事何濟劉長佑余承恩劉景芳均著交部議處姬成功著先行摘去頂帶以示薄懲如再不知愧奮卽著該督從重參辦以肅軍律劉長佑見擬移紮冀州威縣一帶親督各營勦辦著卽振刷精神認真兜擊務將此股迅速殄除毋得再任蔓延致干罪戾溥沱河岸仍當遵奉前旨嚴密扼截毋令搶渡賊匪被勦窮蹙難保不竄至直東交界一

帶復圖句結丁寶楨當嚴檄東省文武實力會剿並將本境伏匿匪徒先行搜捕淨盡以清其源至直隸藁城等縣令於賊股竄至該境時既未能督團帶勇出城防剿又不於該匪竄過後按查奸細尤屬可惡該督所刻之知縣陳金式王養壽丁承衍張恩煦四員均著先行交部議處如再不知振作卽著嚴參懲辦以儆頽靡山東沂水匪徒見經丁寶楨擊散首夥各匪業已擒獲辦理尙屬迅速其餘逃散各匪卽著該撫實力按剿務期淨絕根株以靖後患將此由五百里各諭令知之○癸亥添設奉天昌圖廳經厯訓導各一員學額二名○甲子李鴻章奏捻逆自濰河竄出由莒沂日照趨江南之贛榆沐陽宿遷等處劉銘傳督隊由郟城追賊於八月初八日馳抵贛榆之沙河行二十餘里遇賊大股沿山南來當派善慶等馬隊迎擊該逆且拒且走追至顏家莊唐定奎等步

隊趕到分路鈔擊賊向西南奔逃劉銘傳督軍繞郟城紅花埠十二日馳至沭陽之高流寨賊踞沭城西新河一帶十三日我軍甫過殷坪卽見賊馬前有黃泥河水勢陡漲僅一橋可通任逆率步賊千餘堵住橋口我軍以槍礮轟擊斃賊百餘名賊棄橋走劉朝幹等五營過河追擊賊渡沙河南奔我軍於是夜搭造浮橋十四日過河追擊斬獲甚多賊敗走數里任逆復率眾回犯劉銘傳揮令馬步各隊奮力迎剿賊紛紛潰敗生擒三百餘名槍斃及落河死者千餘名我軍追二十餘里至沭陽城南城圍立解十五日後賊西走宿遷對岸圖撲運河及六塘河經皖軍及漕臣防軍分投堵剿幸未得逞連日陰雨泥水過深劉銘傳約同潘鼎新周盛波冒雨進躡二十日抵宿遷之程寨鈔擊賊館數處擒斬賊匪數十名該逆由窯灣邳州北遁運河之防遂鬆潘鼎新周盛波於十九

日偕銘軍西進二十一日分路逐賊二十三日及賊於沂河東岸
生擒逆酋周毛兒賊不戀戰二十四日由官湖鳧渡至邳賊馬疊
來撲犯均經擊退追至邳北溝上鼎軍頗有擒獲內有賊目黃得
宜一名賊復沿沂河北走二十九日我軍追抵郟城賊又東走海
州潘鼎新周盛波會齊並進三十日抵海屬之雙石舖探賊全踞
房山一帶九月初一日進發石榴寨突遇賊馬斬游騎十餘名該
逆驅全股馬步結數十團衝撲我軍以炸礮擊之賊大潰走連夜
竄向西南初二日盛軍仍由石榴寨向南鈔擊鼎軍由房山東追
遇賊鏖戰兩時賊復潰奔追至安峯山解救難民千餘人初三日
周盛波潘鼎新追抵沐陽之高家寨併力衝殺連開大小炸礮賊
死傷無算是夜賊距我軍四五里周盛傳率隊潛襲之奪賊館三
處賊眾驚走初四日官軍追抵海州之阿湖鎮該逆盡擁而至提

督周壽昌率隊力戰步賊大

敗任逆率悍騎接戰復經我軍擊散

潘鼎新由東路兜剿賊向北

竄其傷斃千餘名竊惟逆眾盤旋

海沐郊宿交界無非多方誤

以圖乘隙竄撲運河各軍連日接

戰屢挫兇鋒見據探稱賊因

我軍偪擊圖竄東境又云仍欲往青

口沐陽似趨向尙無一定

臣

飛飭潘鼎新周盛波察度賊蹤如竄

海沐卽赴沐陽扼剿遮其下竄六塘河之路如竄東境卽相機追

躡一面就辦軍糧更番休養以恤兵飢而鼓士氣劉銘傳轉戰日

久士卒疲勞仍令回紮運河灘上略爲休息再行整隊進剿又奏

曾國藩與

臣

歷次派員出口採辦戰馬陸續發交各營募練馬勇

惟鮑超劉銘傳兩軍馬隊較多鮑超馬隊十二營經曾國藩飭提

督唐仁廉挑選臚壯馬八百匹帶赴

臣

營頃已編立仁字三營交

其訓練協剿劉銘傳所部吉林黑龍江馬隊官兵共七百十五員

名並馬勇二營係副都統善慶統帶又馬勇五營係副將陳振邦統帶此外劉秉璋潘鼎新周盛波各有馬勇二三營不等李昭慶所部馬勇四營見已撥歸郭松林統帶又處州鎮總兵馬德順馬勇四營見隨臣行營操練伏思剿捻必須馬隊得力而捻極狡悍動以萬騎夾數萬步團拌死包裹彼既馬步並進我亦須馬步相依立腳方穩逆首任化邦卽任柱馬賊死黨最多僧格林沁初專以馬隊剿捻其後騎將不甚得力而賊鋒過銳亦賴步隊相依蓋十餘年慣戰之賊不比新起股匪也臣等以南人練馬隊本非素習又少騎將經營兩年愧無成效見惟劉銘傳騎卒較多尙可與賊搏逐然亦難操必勝其餘步隊出剿須有馬隊探護躡追昨方臧商曾國藩廣籌餉源徐議添調或俟運防撤後酌裁守軍以便騰出添練馬隊之餉至馬匹到南隨營遊擊疾病易生麩料難購

動撤倒斃須隨時購補各營駝隻運解輜重奔馳楚豫各省亦多
病斃俟飭查見存確數再行具陳至僧格林沁所部馬隊除疊次
遣撤外見止吉林黑龍江黃旗馬隊三百二十員名據劉銘傳善
慶面稱人馬亦已疲乏軍事稍暇另須撤換又已革副都統溫德
勒克西所帶察哈爾頭二起馬隊係僧格林沁殉難後始行調到
見止三百九十餘員名隨臣差遣馬匹不足亦待新購口馬到時
酌補再令出勦 上諭軍機大臣等自八月初八至九月初四一
月以來劉銘傳潘鼎新周盛波等軍於贛榆沐陽一帶連日躡剿
及賊竄邳境復東走海沭各軍雖小有斬獲然第逐節尾追並未
大加懲創賊勢何能少殺見在該逆盤旋海沭邳宿交界地方爲
多方誤我之計其圖竄東境或仍往青口趨向尙無一定若賊止
則官軍亦圖休息賊去則尾隨其後殃民玩寇何有了期著李鴻

章一面戒備運防一面督飭銘鼎等軍整隊兜剿實力殲除毋任該逆喘息英翰前於宿遷之捷稱賊竄沂境欲派軍赴東會剿該逆見已回竄海沐皖軍正可雕擊著該撫督飭所部黃秉鈞牛師韓等會合淮軍聯絡夾剿以期痛殄逆氛賊蹤既有圖竄東境之信並著丁寶楨於沂境嚴密布置妥籌策應毋誤事機另片所陳查明馬隊馬勇計亦不下二十營之多著該督將見存實在確數及究竟需餉若干查明具奏並將倒斃疲乏之數速籌補足以期騎步相輔迅奏膚功將此由六百里各諭令知之○諭各省提前運解來年新漕○乙丑總理各國事務衙門奏原議十年修約爲期已近請飭濱海沿江通商口岸地方將軍督撫大臣各抒所見從之○丙寅兵部議覆閩浙總督吳棠奏請將新設福建陸路提標後營都司改設大田縣城以原隸漳州鎮之同安營改隸提標

該督爲慎重地方起見應如所奏辦理惟查國家設立營制本極周密如果今昔情形迥異原可量爲變通嗣後儻非關緊要仍飭恪遵定制不得遽議更張從之○丁卯添撥東河隄工銀四萬兩○以河工搶險捐軀子河南同知王仁福建祠○己巳諭軍機大臣等富明阿奏馬賊竄掠霍羅站一帶派兵往捕一摺奉天昌圖廳等處自八月閒卽有馬賊疊竄吉林邊境擄搶民財追殺昌圖廳差役續復在霍羅站鷲溝石虎子及昌圖所屬八家子等處肆行搶劫盜匪張金劉占鼈等已聚至百餘名之多若不卽時撲滅勢必嘯聚日眾又將合成大股剿捕益形棘手著富明阿卽飭派出官兵趕緊馳往該處迅速掩捕並著都興阿迅派奉省官兵馳往昌圖廳一帶與吉林之兵會合夾擊一面督飭該地方文武認真緝捕務期就地殄除淨絕根株不得縱令旁竄致滋蔓延將此

由五百里各諭令知之○諭丁寶楨奏捻股繞折西竄飭軍跟追一摺捻匪不得南渡運河折向西趨似向邳嶧一路竄逸若沿運西趨必將徑奔鄒滕兗曲一帶臺莊見有李鴻章所統各營在彼駐紮韓莊水勢尙深鄒滕一路並無一軍扼紮若任賊狂奔勢必到處蹂躪肆意縱橫丁寶楨見在統攝諸軍分路追躡卽著探明賊蹤嚴飭各將弁實力遏擊毋任分竄王心安係屬債事之員此次若能奮力殺賊尙可稍贖前愆儻再不知振作必不能曲從寬宥李鴻章全部諸軍距賊不遠賊若果趨鄒曲一路平行數百里毫無防禦東軍兵力單薄不敷堵遏著該大臣嚴檄各部會合諸軍趕緊兜擊庶免蔓延儻各路兵勇不肯認真剿賊無論淮軍東軍李鴻章當卽查明治以失律之罪毋容疏縱黃運兩河情形均關緊要賊騎剽疾異常恐其竄撲河干著劉長佑李鶴年英翰迅

飭運黃防兵加意嚴堵毋令賊蹤竄出更成不了之局將此由六百里各諭令知之○諭總理各國事務衙門奏義大利亞國換約屆期請派員互換一摺義大利亞國前立條約聲明一年互換見據該國公使呈遞照會內稱擬於九月間赴滬即可在彼換約請派員前往上海會辦等語該公使見已到滬應即將條約互換著派丁日昌將上年與義大利亞國所立條約妥爲互換其條約各本俟崇厚派員齎送至江蘇時卽著丁日昌祇領屆期前往上海辦理並著軍機處將此次寄諭摘錄一併發往如該使索看憑據卽可給予閱看俟換約事畢此旨仍繳還軍機處備查總理各國事務衙門摺一件著鈔給閱看將此由五百里諭知曾國藩並傳諭丁日昌知之○庚午諭內閣曾國藩郭柏蔭奏前任巡撫剿賊陣亡請於立功地方另建專祠並請將陣亡各員附祀一摺前江

蘇巡撫吉爾杭阿於咸豐六年在鎮江剿賊陣亡當經奉 旨賜卹於殉難地方建立專祠並將同時陣亡之知府劉存厚附祀同治元年復經降旨賜祭一壇惟念該前撫克復上海縣城厥功甚偉其家屬屢在鎮江尋覓忠骸至今未獲不能入城治喪殊堪憫惻著准於上海新埔地方另建吉爾杭阿專祠春秋官爲致祭並著該旗都統傳諭家屬卽用衣冠治喪以妥忠魂其同時殉難之江甯府知府劉存厚及前在上海死事之已革知府謝繼超定廣營副將清長光祿寺署正銜胡枚准其附祀○諭軍機大臣等穆騰阿奏梟匪南竄及各軍擇要分紮以杜回竄一摺梟匪竄走鉅鹿後繞由山東邱縣等縣回竄曲周等處計有二百三十騎賊本贖有敗殘百餘茲復又裹脅加至兩倍總由主帥督催不力爲將弁者遂多觀望自便似此玩延何日方能蕝事可恨已極穆騰阿見

擬於雄縣鄭州鎮各處派兵駐紮以防北竄著卽督飭湯繼揚等實力堵遏毋使泄沓任情賊至不知賊去張皇聲勢藉圖卸責滹沱河東北一帶尙屬空虛劉長佑務當分飭得力將弁相機填紮並令會合穆騰阿所派各軍互相援應其保定一路應如何籌防之處亦著該督悉心布置賊在直省來去自如該督等由軍營歷保疊沐恩施自問何以自安也賊蹤飄忽靡常若直省各軍追剿得力勢必走而之東著丁寶楨檄飭東省防軍遇賊卽擊毋任再行竄擾致貽大患將此由五百里各諭令知之○賞普濟堂功德林賑米八百石○辛未允崇厚奏調察哈爾馬匹操練駐津京兵○予陝西陣亡訓導聶鶴年遊擊汪貴等祭葬世職○壬申命趙長齡整飭山西鹽務○命駱秉章撫恤四川巫山縣被水災民○甲戌定降革開復人員升銜翎枝章程○丙子諭軍機大臣等都

興阿奕榕奏籌辦孤山木匪事竣調兵駐紮並訂期出邊查勘各一摺孤山土匪續經擒獲五十餘名並拏獲匪首金四彪等正法地方漸已肅清大東溝木匪盤聚至數千人經奕榕派員開導均各畏罪抒誠願將木植盡數交官該副都統見將木植一半入官一半售價酌給該游民川貲陸續遣散辦理甚是見在孤山地方已經都興阿派令開復協領穆錦等帶兵三百餘名駐防卽著飭令該協領妥爲彈壓隨時認真按捕以免餘孽復萌至木簞之起均係山東流民及本地窮民出邊偷斫運至大東溝售賣上年經色爾固善查辦卽各懇交木植本年復敢偷斫私運是其狡猾伎倆業已習爲故常並聞多係本地紳富等出貲雇覓該游民等出邊私斫源之不塞流何能絕並著一併究查以期剷其根株庶不至年復一年罔有底止奕榕見定期出邊查勘卽著妥爲相機辦

理嗣後再有游民偷砍私運一經拏獲並將出賃雇覓之紳富等一併嚴辦毋稍寬縱此次孤山勦匪及辦理本籍游民在事各員著准都興阿奕榕酌保數員毋許冒濫將此由四百里各諭令知之○李鴻章奏劉銘傳聞賊近宿遷於九月初四日帶八成隊由邳州灘上迎戰於初六日行抵郟城探悉潘鼎新周盛波在海州阿湖鎮獲勝賊仍竄踞石榴樹以東及牛山一帶初八日卽率隊東向行三十餘里至王堰地方徧是賊館當令善慶陳振邦馬隊從兩旁鈔襲衝進賊館該逆猝不及防互相驚潰劉銘傳督馬步急追逆眾屢創之餘紛紛退去我軍追二十餘里東至牛山擒斬三百餘名賊於是夜聚住房山一帶陳振邦派降酋鄧長安等率領馬勇襲取賊館十餘處殺賊百餘名任賴各股均卽驚遁初九日追至房山賊已北趨贛境劉銘傳因行糧已斷曠野難購仍回

邳州鼎盛二軍亦絕糧數日周盛波赴臺莊運米潘鼎新往郟城就糧十一日賊復折走西北由邳郟境內晝夜急趨入東潘鼎新遇賊於郟城之馬頭集派隊截擊小有斬擒劉銘傳又自邳州出隊速追十二日陳振邦馬隊及賊於邳州蘭山交界之梁岬山叻鹿山一帶生擒四十五名陣斬悍賊百餘名十三日賊由洪山蘭陵竄走東軍駐守蘭陵之總兵楊飛熊迎擊十四日賊走嶧縣山中臣派溫德勒克西馬德順等馬隊循山南兜剿賊直奔滕縣一路韓莊以下防河各營均出隊截擊潘鼎新冒雨由嶧滕相機兜進臣飭其鈔過賊前馳往濟甯一面策應運防一面整頓休養再行會合追剿查該逆盤旋郟宿海流之交已近月餘圖撲蘇境運河經各軍固守緊追計不得逞劉銘傳潘鼎新周盛波等疊次戰勝該逆乃折而入東又由嶧滕西向必欲乘虛窺撲濟甯以上運

防臣先已密飭東境防河之淮軍楊鼎勳鄂軍譚仁芳劉維楨豫軍張曜宋慶等嚴爲布扼並因豫軍汛地較短力量較厚飭宋慶酌抽行隊在東平汶上就近游擊適張曜稟稱秋閒黃水大漲沈口戴廟南北岸平地水深數尺汪洋似湖隄牆大半漫圯無可設守該軍避水已移靳口東岸臣飭張曜俟賊竄近卽在東汶附近攔頭截剿使賊不敢窺犯黃運邊界仍俟十月後水漸消涸再籌堵禦計濟甯上下有鼎軍夾擊東平汶上有豫軍夾擊目前暫可支持劉銘傳追賊過勞所部將士患病甚眾暫在邳州休養趕置寒衣豫備三冬長驅轉戰臣復抽撥運防隊伍交郭松林及時整練爲會合兜剿之用並遴委員紳分赴兗沂青泰各屬會商地方官勸諭多購糧草以備追軍過境急需臣俟後路各事布置釐定再移紮濟甯督率調度又奏丁寶楨以濰河前事謂臣倒置是非

仰蒙 聖明詳切訓誡臣敢不懷遵自夏閒賊入東省後丁寶楨
卽欲逐賊出境固身任地方之常情臣初謀困賊膠萊繼圖扼賊
運防蓋思所以制賊之方扼膠萊爲上策其次則蹙之運河以東
竄地較狹追剿較易無論能否辦到勢固不得不辦卽如賊出濰
河將近兩月若非運防有備賊飆疾如飛必已竄過兩省官軍步
隊尾追何及劉銘傳追賊最速每稱往年追千餘里行至一兩旬
方得見仗轉瞬則又失之今賊在運東不過數日數程便可躡擊
一交冬令野無所掠賊或漸窮出運不能則必求戰臣見整集各
軍擬籌出三大枝爲合力兜剿之計但捻逆人馬眾多戰軍須加
整練不能不稍待時日再客軍入境呼應不靈全賴地方官扶助
照料況捻賊到處流竄賊至兵隨城寨俱閉惟地方官偵知是兵
辦運糧草給價購買則賊常飢而兵可飽而賊亦不難滅矣臣前

已分派員紳赴東省各郡豫商購儲尙未據報購存若干銘鼎盛各軍昨過邳城仍辦糧不出目下各軍不憂賊之難擊轉恐軍之常飢從此不能責飢軍以用命誠可慮也 上諭任賴逆股竄踞海州一帶經劉銘傳等督馬步急追該逆於九月十一至十四等日由邳邳入東見竄嶧滕等境勢將乘虛窺撲濟甯以上運防著李鴻章嚴檄派出各軍分路布置防剿兼施丁寶楨務當督飭東軍會同李鴻章所部通力合作迅籌滅賊之方黃水盛漲沈口戴廟南北岸汪洋一片見雖無可設守瞬交冬令水漸消涸若該逆乘閒偷渡直東一帶兵力空虚恐難遏其奔突著李鴻章迅卽抽撥勁旅嚴密防維毋令該逆偷渡北竄李鴻章俟布置羈定卽前赴濟甯親爲調度賊匪竄入東境逆倖甚熾李鴻章身膺統率正應通籌全局趁水漲防固藉地利以勵軍心埽蕩逆氛又何庸曉

曉置辯希圖卸責爲也朝廷命將出師總以剿賊之有無成效爲斷李鴻章惟當督飭劉銘傳等軍視賊所向迅速殄除以副委任李鴻章各營躡賊入東全賴地方官妥爲接濟著丁寶楨將該營應需糧草等項飭屬豫商購儲儻因軍糧缺乏致誤戎機必惟丁寶楨是問該逆見雖入東海沭等處仍有踞賊竄擾張之萬擬添募勇隊二百名並調駐防龍溝之礮船駛赴薔薇河防守卽著妥籌布置據該漕督奏稱俟曾國藩籌出月餉卽當趕募遊軍追剿等語應如何籌款協濟之處著曾國藩斟酌辦理六塘河旣難撤防卽著李鴻章張之萬飭令劉秉璋一軍及浙軍三千人專顧清淮一帶運防並著英翰激勵將士會同東軍及湘淮等軍聯絡聲援遇賊卽擊以期迅殲醜類英翰奏宿遷守運擊賊各軍異常出力著准其擇尤保奏並將郊城之案彙入奏獎前諭曾國藩將清

淮防務悉心布置卽著迅速奏聞將此由六百里各諭令知之○
予江蘇陣亡副將吳從發祭葬世職○丁丑諭軍機大臣等丁寶
楨奏捻逆撲竄蘭陵各軍迎剿接仗情形一摺捻匪竄聚蘭陵洪
山一帶經楊飛熊迎擊斃賊千餘名另股賊匪在西泇河肆擾亦
經王心安等追剿獲勝目前賊眾向魚溝向城等處奔逸亟宜乘
機力剿著丁寶楨迅飭楊飛熊等併力追擊毋令賊得喘息以期
速殄逆氛惟攔頭迎擊之師止有常武一軍恐難制其奔突李鴻
章迅卽催調各軍視賊所向合力兜擊不得藉詞休息坐失事機
賊勢漸將北趨運防尤關緊要李鴻章必須統籌全局防剿兼施
毋稍大意直隸河防並著劉長佑嚴檄在防各軍嚴密防禦以杜
竄越另片奏直隸梟匪逸入臨清等處經東軍追剿回竄曲周殘
匪僅百餘人已令傅振邦越境追剿等語著丁寶楨咨會該提督

統率所部實力剿洗劉長佑務當激勵將弁會合掃蕩將此股就地殲除毋令肆竄將此由六百里各諭令知之○予山東陣亡遊擊王世發祭葬世職○戊寅諭軍機大臣等總理各國事務衙門奏請飭西路統兵大臣分別剿辦事宜一摺塔爾巴哈台回匪滋事哈薩克曾助該匪戕害人民擄掠物件見在逃赴俄境榮全前給棍噶札勒參咨文意主於撫而該呼圖克圖前奏請飭俄國將哈薩克逐出意主於剿惟該哈薩克向分數種夏莠不齊自應分別剿撫不得將安分及被脅之人一概誅戮致令鋌而走險羣起抗拒叢生枝節見在總理各國事務衙門業已照會俄使轉咨古畢爾那托爾令將此項滋事之哈薩克全行逐出著麟興榮全李雲麟等迅卽查明是否均係塔爾巴哈台起事正賊抑另有別項哈薩克裹脅在內務須轉飭棍噶札勒參分別懲辦榮全前在俄

境於各哈薩克情形較爲熟悉所有勦撫機宜著傳知該呼圖克圖與之妥籌商辦總理各國事務衙門原摺著鈔給麟興等閱看將此由六百里各諭令知之○加賞通州王恕團賑米一千石○己卯以孟冬時享 太廟 上前期親詣行禮○諭軍機大臣等劉長佑奏直東會辦梟匪並分軍追截情形一摺梟匪前被直軍勦敗僅餘百餘騎見復乘閒南遁繞竄臨清冠館並直境之廣平大名各屬邑又裹脅三百餘人之多各軍雖於追截時小有斬獲而賊騎剽疾倏忽奔馳若不設法趕緊殲除將來蔓延益甚辦理更難著手劉長佑督勦此股數月以來迄無成效實屬不成事體該督見已由河閒馳赴前敵著卽督令派出各軍分投追截務須認真勦擊不得虛與委蛇有名無實儻再日久無功恐不能當此重咎也余承恩不能力勦乃於梟匪回竄曲周時與傅振邦商同

計誘致令窮蹙餘匪又稽剿戮實屬玩誤姑念其連月跟追暫免置議以觀後效儻再延玩卽著該督嚴參同知余沛恩副將常開運案營之處距賊較近於該匪宵遁時未能卽刻追剿疲玩已極均著先行摘去頂帶此後如有仍前玩誤各將弁該督當隨時嚴參懲辦用肅軍律將此由五百里諭令知之○諭蘇鳳文奏南太軍務喫緊一招廣西太平府屬土匪蔓延南甯匪徒乘時蠢動吳亞終分踞隆安雖經擊退尙在太平邊境該兩屬羣匪環伺句結響應若不迅集勁旅早日撲滅滋蔓難圖又成不了之局廣西各軍不敷剿辦且無大員督率尤恐進止不齊難期得力馮子材自五月以後剿辦南丹等處土匪已將蕞事正可赴邕督辦著該提督卽日拔營親帶所部得力之師馳赴左江專辦南太軍務所有見紮南太各營弁勇均歸調度該提督到防後卽督飭各將士將

首要各匪次第剷除務期淨盡兵力尙虞不足蘇鳳文已經籌畫經費交該提督派員赴靈山欽州等處添募勁勇卽著趕緊招募成軍以期得力馮子材未到以前仍著蘇鳳文督飭各軍就見有兵力認真防剿毋稍疏懈將此由五百里諭知馮子材並傳諭蘇鳳文知之○署廣西巡撫蘇鳳文奏鎮安官軍疊獲勝仗得旨著卽嚴飭覃遠璡乘勝進剿將歸順州匪巢剋日攻拔以清邊圉又奏來賓等州縣土匪蠢動均經隨時撲滅見仍分檄各文武督率兵團設法進剿批著卽檄飭各該地方文武將大鎮滿村餘匪剋日殲除匪首王沅虧在逃著飭屬嚴拏務獲究辦並通飭各屬嚴密巡緝務期有匪必獲以清餘孽○命李瀚章賑撫湖北襄陽等府被水災民○命瑞麟等撥銀四五萬兩充廣西軍餉○賞五城貧民棉衣銀

冬十月庚辰朔諭軍機大臣等據張亮基奏擊退近省竄匪一摺八月初間潘逆遣黨數千人竄擾狗場等處經宋國楨等截殺斃匪數百名該逆敗回老巢難保不復出肆竄著曾璧光督同張文德等相機進剿並將省城防守事宜妥籌布置仍咨會劉嶽昭飭令派出之楊正高一軍合力剿辦迅殄逆氛將此由五百里諭令知之○署貴州巡撫張亮基奏剿辦修文逆匪殲斃逆首李疤臉報聞○辛巳諭軍機大臣等丁寶楨奏擒股北竄探蹤進剿一摺捻逆自向魚溝向城奔竄後經王正起跟蹤追擊疊有斬獲復在鄒縣地方與賊大戰賊向曲阜滋陽各路奔竄繞至大汶口東北逸去又將由泰安竄擾省城經丁寶楨派兵攔截遂折向東南擾至新泰丁寶楨見已馳抵泰安親督王成謙等跟蹤追擊著卽嚴飭各路兵弁實力追剿毋令賊匪肆意奔突賊眾盤繞海嶺等處

李鴻章所部未能協力夾擊痛加剿洗以致兇餘日張此次回竄東境蔓延多處又未見淮軍會剿李鴻章身任欽差大臣剿捻是其專責所統各部不爲不多乃竟任賊縱橫毫無調度殊屬大負委任儻再仍前玩誤致東省徧遭蹂躪丁寶楨固屬罪有應得而李鴻章身爲統帥責有攸歸朝廷亦惟執法從事不能再爲該大臣曲貸也賊中開花礮甚多此等利器本係官軍購造何以竟爲賊有著李鴻章查明據實具奏毋稍徇隱將此由六百里各諭令知之○予山東陣亡參將徐金聲等祭葬世職○壬午諭軍機大臣等張凱嵩奏通籌辦滇情形一摺滇省軍務積疲已久該督見擬由粵西募勇並挑選川滇勇丁各數千名應用並擬暫駐東昭布置先剿迤西其餘剿撫並用所籌尙合機宜均著照所擬辦理惟雲南省城不可無督撫大員坐鎮該督抵東昭後布置稍定卽

當酌帶新募所部進駐省垣不可如賈洪詔林鴻年之逗畱觀望
自干咎戾省垣回教紳民如馬如龍等當分別妥爲駕馭以收其
用毋令眾回猜疑另生枝節劉嶽昭勦辦黔西大致肅清不久卽
可帶兵入滇該督當與之合力籌商以期其濟其委員分赴川湖
江粵設局勸捐之事著該督卽知照各該省督撫辦理將此由六
百里諭令知之○諭各直省興復義倉○飭湖南月撥銀二萬兩
四川月撥銀四萬兩濟滇餉○癸未河南巡撫李鶴年奏報東西
各路情形得旨任賴捻股由鄒縣竄至新泰已爲丁寶楨督軍繞
截偏向東南該撫仍當督飭張曜等認真遏守運防以杜回竄西
岸隄塘水勢稍退卽飭防軍趕緊修築豫省西北兩路邊防仍著
督令嚴密遏守毋稍鬆懈○嚴諭各路統兵大臣整頓營務○甲
申調奕慶爲盛京工部侍郎桂清爲理藩院右侍郎在弘德殿行

走○丙戌諭內閣劉岷奏援黔官軍日久生玩請將統領各員懲辦一摺貴州苗教各匪擾亂十餘年前李瀚章撥兵往援奏派兆琛周洪印李元度等分路出師兵勇數逾三萬並請由兆琛奏報軍務以一事權該統領等果能調度合宜自不難剋期掃蕩廓清貴東乃兆琛駐紮八弓地方任令苗匪出竄毫無布置奏報諸多粉飾所用營官見賊不戰徒肆騷擾貽誤地方實屬有負委任湖南布政使兆琛著先行開缺交部議處記名提督周洪印帶兵防剿避賊而行始勤終怠廢弛邊防著降爲參將隨營效力如再不奮勉卽行從嚴參辦開復布政使銜李元度攻圍荊竹圍賊巢尙能耐勞惟頓兵日久未能攻拔亦難辭咎著降爲三品頂帶仍責令力扼要隘相機進取以觀後效○諭軍機大臣等左宗棠奏查明甯條梁收復米脂榆林擊退賊匪並宜君縣城失守後收復

情形各摺片甯條梁被賊攻撲闌入街巷敦奇祥阿不能抵禦肅
明發請援時又不能救經薩斌圖等奮力衝擊賊始敗退本日已
諭令穆圖善將該員等功過覈實查明分別奏辦矣米脂榆林撲
城之賊雖經陝省兵勇擊退惟北路餘匪尙未殄盡左宗棠等當
督飭地方文武實力殲除不可稍存大意宜君城垣於失守後經
劉厚基馳往收復惟陷城之賊並未被剿先期遁歸甯州難保其
不去而復來與捻匪勾結著左宗棠喬松年分派兵勇於鄜延交
界一帶嚴密扼截毋任回竄左宗棠另摺奏新募吉林礮手冗雜
不堪應用等語此項馬隊沿途逃逸甚多其帶兵之員未能約束
著左宗棠查明參處見在存營勇丁仍著該大臣斟酌挑選擇其
尙堪適用者畱營訓練其餘概行裁撤責成派出之員管帶回旗
毋任仍前逃逸陝省剿捻情形見在若何著該大臣隨時馳奏以

慰廬繫將此由六百里各諭令知之○諭穆圖善奏擊退撲省回匪並請撥馬隊洮州等處回民投誠各摺片河州東鄉回匪膽敢糾眾撲犯省垣經穆圖善督飭文武各員將賊擊退該匪勢尙囂張亟須厚集兵力早日翦除方免心腹之患見在穆圖善抽調各營分路進取著卽安速調度迅殄逆氛彭楚漢等各員著暫行存記俟續立功績再行奏請獎勵甘省匪熾兵單自係實在情形惟陝省剿辦捻逆正須馬隊與之角逐勢難分撥來甘東北重地不可空虛著嚴檄延安一帶防軍就見有兵力認真防剿不可大意胡世英是否可恃並著查明妥籌調遣毋得稍涉遷就甯州賊匪竄陷陝省宜君等處經陝軍擊退回巢著穆圖善飭令甘軍盡力剿洗毋令再竄陝境雷正綰見調來省卽著畱心察看如果堪備任使再行奏明請旨洮州回民投誠若非詭詞乞撫自不妨予以

自新穆圖善當確切查辦不可墮其術中參將范銘著暫行存記俟辦有成效再行請獎回弁丁永安曾否爲逆仍著穆圖善確切查明秉公嚴辦本日據左宗棠等奏賊擾甯條梁副都統敦奇祥阿不肯分兵禦賊經薩斌圖與蕭明發合隊始行擊退著穆圖善將該員等功過覈實確查分別奏明辦理將此由六百里諭令知之○諭劉崐奏縷陳西路各軍疲玩情形據實糾參籌畫援黔事宜並籌辦本省團防各一摺湖南援黔各軍數逾三萬兵力不爲不厚乃兆琛等入黔以來辦理年餘糜餉老師毫無成效致令黔楚邊境賊蹤愈肆蔓延實堪痛恨席寶田見已募練成軍著劉崐卽飭迅赴沅州總統援黔軍務所有前派援黔各軍令其分別撤畱大加整頓務須一兵得一兵之用以期壁壘一新勦辦方有起色黔楚唇齒相依見在黔省下游如此糜爛全賴楚軍協助劉崐

當力顧大局隨時督飭各軍奮勉圖功以副委任曾璧光亦當飭令地方文武督率團練協同勦辦該省吏治廢弛已久遇有克復府縣卽當慎擇官吏籌辦善後以靖地方湖南各屬會匪潛伏黨與甚多亟應加意防範以杜亂萌固不可操切從事亦不可養癰貽患劉崐擬飭各屬辦理團防自是目前要圖劉蓉曾任大員於本籍情形較爲熟悉卽著派令幫辦團防事宜以資得力將此由五百里各諭令知之○飭各省迅解協甘餉銀○予陝西殉難知縣張杰甘肅陣亡提督周保和等祭葬世職○丁亥以李榕爲湖南布政使王文韶爲湖北按察使

由安襄歸
荆道運

○戊子李鴻章奏潘

鼎新於九月十六日帶隊馳抵滕縣之臨城驛適賊由嶧境出竄潘鼎新且戰且行至柴戶店賊以大股來衝當派總兵張景春等分路迎擊賊退回東路山下十八日賊騎數千復來偷襲潘鼎新

先派槍隊設伏樹林賊至伏起擊斃賊酋陳金幅楊天燕二名餘
眾潰走十九日各營分進兜剿賊亦分兩路包裹我軍槍礮齊發
愈戰愈酣騎賊先敗步賊紛潰由滕縣大道北趨兗濟是晚游騎
已至濟甯南陽湖邊窺伺經鼎營水師徐道奎分投扼剿潘鼎新
卽馳往濟甯策應運防二十一日賊眾由兗州走甯陽邊馬向濟
甯迤北奔竄偵知運防嚴密未敢撲犯二十二日豫軍宋慶派馬
勇由東平迎探行抵汶河正遇馬賊過河一擊卽遁我軍乘勢追
殺斃賊數十名生擒十餘人張曜因黃運盛漲亦抽隊進紮汶平
之交準備會剿二十三日賊遂東走泰安折向東南大路狂竄二
十四五等日由新泰蒙陰南走似又將回竄沂莒臣將後路運防
部署略定卽於二十五日由臺莊啟程飭徐州鎮總兵董鳳高帶
小隊移紮臺莊北岸涼州鎮總兵周盛波督所部移紮韓莊八驢

由韓莊南陽湖沿途察度布置二十九日馳抵濟甯函屬劉銘傳將疲病弁勇畱守邳州灘上藉休養以設防卽酌帶精銳隊伍探賊所向迎頭截剿古州鎮總兵劉士奇患病未痊所部奇字馬步八營與南贛鎮總兵王永勝開字馬步十一營均以兵力過單未足獨當一路飭將奇營併歸郭松林統帶開營併歸楊鼎勳潘鼎新分統厚集其勢趕緊整練約本月內可先後出剿與劉銘傳合力會戰所有鼎軍十九日陣亡之都司楊占魁從九品白璧請旨飭部從優議卹 上諭軍機大臣等捻逆由嶧縣出竄經潘鼎新所部槍隊擊敗遂由滕縣擾至濟甯南陽湖邊潘鼎新馳往策應賊知汶平各防俱有準備東走新泰蒙陰等處勢將回竄沂莒李鴻章從韓莊南陽湖一路馳抵濟甯並將總兵董鳳高等分別駐紮著卽妥爲布置相機進剿不得以賊蹤南趨耽延戰事劉銘

傳等軍見在留紮邳州等處務當責令該提督等各軍所部遇賊卽擊毋以有用之兵置諸無用之地奇開兩營併歸郭松林等分統並著檄令各該營統領趕緊訓練以期互相援應力挫賊鋒將此由六百里諭令知之○辛卯諭軍機大臣等本日據丁寶楨馳奏捻逆避兵東竄擾近省垣一摺捻逆由新泰南趨意在引兵南追該逆乘閒由沂水折回北趨大股屯聚虎山泊距省甚近丁寶楨見已馳回省城著卽將城守事宜嚴密布置毋稍大意並卽督率諸軍相機進擊亦不可株守省垣致成坐困李鴻章督率各路兵勇爲數不少數月以來並未能實力截剿痛挫賊鋒見在賊趨省垣又不能迎前兜擊任令逆蹤奔突狂竄蔓延至此百姓備極荼毒諸軍恣爲縱逸猶復漫無籌畫自問於心何安著卽嚴飭各軍覘賊所向與東軍合力剿擊互相援應以期迅殄賊氛李鴻章

丁寶楨務當屏除積習和衷其濟不得各懷私見靳口至申口一帶水勢恐漸消落所有沿河隄牆李鴻章當趕緊修築以資防守前據李瀚章曾國荃奏稱飭令霆營帶兵之提督唐仁廉等統率馬勇並戰馬一千匹赴濟甯歸李鴻章調遣到營後曾否訓練精熟婁雲慶在安陸募勇五千見計早可成軍著李瀚章曾國荃飭令該提督卽日拔營馳赴東省歸李鴻章調遣李瀚章等不得藉詞畱鄂並著李鴻章飛速迎提以厚兵力前經諭令李鴻章調撥江西兵勇赴江南一帶防河見在曾否派令來營迄今數月尙未覆奏如此軍到防李鴻章並可抽出見防河牆兵勇爲追剿捻逆之用該逆馬騎飄忽日馳二百餘里北路黃防勢甚喫緊劉長佑崇厚當飭沿河諸軍加意嚴防不可稍有疏失直隸梟匪何以許久尙未殄盡劉長佑若不振刷精神早行殲滅設令捻偏河岸內

外益難兼顧恐該督不能當此重咎也懷之將此由六百里各諭令知之○予四川陣亡遊擊劉萬朝祭葬世職○壬辰諭軍機大臣等宋延春奏迤西賊匪竄踞各縣省會戒嚴見咨調兵練援應剿辦情形一摺據稱迤西逆匪數萬將定遠縣城竄踞分陷大姚縣城並有取道黑井等處由元謀馬街竄擾武定祿勸等州縣徑撲省城之意馬如龍在省養病所部不敷分派見已咨調岑毓英帶兵回滇相機進剿等語省城爲根本重地自應妥籌防剿岑毓英旣已撥兵五千馳回省城卽著宋延春會同馬如龍就見有兵力分投剿辦張凱嵩前有暫駐東昭先剿迤西之奏此時該省情形萬緊該督尤應先入省城著卽迅將勇丁募齊審機前進或派令得力將弁管帶兵勇星速取道赴援不得以招募未集藉詞遲延劉嶽昭見在剿辦黔西股匪務當迅圖蒞事帶兵入滇與張凱

高等合力籌辦岑毓英見已撥兵援應該藩司應否馳回省垣之處著劉嶽昭懷遵九月初九日諭旨與宋延春妥商辦理定遠大姚兩城失陷文武各官下落著宋延春詳查具奏將此由六百里諭知張凱嵩劉嶽昭並傳諭宋延春知之○癸巳諭內閣都察院左都御史汪元方品端學粹辦事勤能由道光年間翰林屢掌文衡洊升卿寺朕御極以來疊加簡任擢至都察院左都御史復令在軍機大臣上行走夙夜宣勞克盡厥職前因患病兩次賞假調理方冀速痊長資倚畀遽聞溘逝軫惜殊深著賞給陀羅經被派郡王銜貝勒載治帶領侍衛十員卽日前往奠醑賞銀二千兩治喪由廣儲司給發加恩晉贈太子少保照尙書例賜卹任內一切處分悉予開復應得卹典該衙門察例具奏伊子恩監生汪樹屏著賞給舉人准其一體會試監生汪樹堂著賞給員外郎銜俟服

閱後分部學習行走監生汪樹廷著俟及歲時帶領引見其靈柩
回籍時著沿途地方官妥爲照料用示朕篤念耆臣至意尋予祭
葬諡文端○允李瀚章奏湖南本年漕糧仍徵折色○以譚廷襄
爲左都御史調毛昶熙爲戶部左侍郎轉吳存義爲吏部左侍郎
以胡肇智爲吏部右侍郎由宗人府府尹遷○甲午諭軍機大臣等劉長
佑奏剿辦梟匪情形並調馬隊追剿各摺片梟匪由隆平柏鄉一
帶折向邯鄲成安逃赴東境復竄回直境往來於正定各屬雖經
官軍扼截於滹沱河岸未容該逆北渡而賊騎縱橫馳突迄未大
受懲創劉長佑辦理此股已經數月所部兵勇不爲不多賊數僅
百餘名竟未能殲除淨盡將何顏以對朝廷見在添調馬隊厚集
兵力會合步隊追截著卽親督所選各軍迅將此股殄滅毋得再
事遷延致干重咎並著嚴飭各地方牧令聯絡鄉團堅壁清野俾

賊騎無可擄掠以期早行葢事另片奏請將已革都司馬學孟准令效力等語馬學孟原犯罪名較重既於投首後帶勇殺賊屢次出力著准予自新令其戴罪自效仍著該督隨時畱意察看如果真心悔罪續著勞績再行分別辦理將此由五百里諭令知之○命署禮部右侍郎沈桂芬在軍機大臣上學習行走○予湖北軍營病故提督馮標建祠安徽陣亡縣丞羅發恩祭葬世職○以前任山西布政使王榕吉爲順天府府尹○乙未諭軍機大臣等丁寶楨奏捻逆撲犯黃防見經擊退並請飭李鴻章熟籌黃運情形各摺片捻逆竄至章邱擾及齊東一帶撲犯河隄搶奪民船注意渡河經丁寶楨派兵擊退賊眾奔向長山該撫見赴章邱親督各軍截剿著卽相機進擊力掃狂氛黃防雖暫時解嚴尤慮賊股回撲該撫當厚集兵團加意嚴守毋稍鬆勁武定下游並齊河以上

一帶黃防劉長佑崇厚當懷遵前諭督飭諸軍晝夜巡警以備不虞不可稍有疏忽黃防情形如此緊急劉長佑若不振刷精神速將梟匪殄盡何以專力防河李鴻章督剿捻匪是其專責自當視賊所向盡力追截今賊股北竄濟南撲犯河岸該大臣並無一兵追及竟若置身事外者不知所辦何事乃竟漫無調度若此黃防兵力本屬單薄轉瞬天寒冰凍搶渡尤易設令震及畿輔該大臣自問將何以對朝廷著卽滌慮洗心屏除成見總以厚集兵力嚴遏北路偏賊南趨迅圖殄滅以全大局不得與丁寶楨強分畛域固執已見致誤事機丁寶楨所陳運黃兵力南厚北單並黃河冬防難恃等語亦係實在情形李鴻章當統籌全局妥議辦法奏聞原摺片各一件著鈔給該大臣閱看將此由六百里各諭令知之

○諭駱秉章奏請畱周達武在川帶兵一摺貴州軍務極爲緊要

該省見無得力之員可資統率刻下貴陽一帶賊蹤紛竄時思窺伺省垣周達武自應迅飭赴任藉資防剿著駱秉章仍遵前旨飭令卽赴貴州提督之任不得再行奏畱致誤大局川省邊防各軍卽著該督另擇將領統帶妥籌布置將此由五百里諭令知之○飭各省迅解協黔月餉○丙申諭軍機大臣等沈葆楨奏洋將購器募工均已就緒並請令周開錫始終其事畱李慶霖差遣各摺片洋將日意格回國採辦器具俱已齊備並雇覓工匠人等十月後可陸續到閩卽著沈葆楨會同英桂李福泰督飭局員及該洋將等將應辦工程安速布置一面趕造船身輪機到時卽可配製前署藩司周開錫道員胡光墉前經左宗棠等奏派充局員並據左宗棠奏稱但願謹守條約可望有成是左宗棠於船政一事責成該員等確有把握著沈葆楨傳知周開錫專意從公毋得畏難

退阻並著馬新貽迅催胡光墉剋期赴閩以資差委道員葉文瀾
見在已否到局該員前有被控之案著英桂李福泰速爲秉公斷
結知府李慶霖前經吳棠奏參革職勒令回籍茲據沈葆楨奏稱
該員在局襄辦有年尙無劣蹟著准其暫畱船政局差遣儻復始
勤終怠卽著沈葆楨據實參撤毋稍回護所有船政一切事宜著
英桂等俟吳棠旋任後詳細商榷和衷辦理將此由五百里各諭
令知之○曾國荃以病免調郭柏蔭爲湖北巡撫未到任前以湖
北布政使何璟護理以蘇鳳文爲廣西巡撫調江忠濬爲廣西布
政使以蔣志章爲四川布政使劉齊銜爲浙江按察使由陝西督
糧道遷
○戊戌諭軍機大臣等劉長佑奏捻氛東偏黃防戒嚴一摺前因
丁寶楨奏捻匪竄擾齊東一帶撲犯河隄已慮及黃河冬防難恃
卽經諭令李鴻章統籌全局妥議辦法並令劉長佑丁寶楨崇厚

等實力嚴守節交冬令堅冰凝合自在意中亟須嚴爲之備以固
畿輔河面綿長固非直軍所能專任張秋以下至鐵門關東軍原
不能辭責但東省兵力本屬單薄見在與捻匪角逐尙覺不敷分
布黃水下游河面更狹賊匪窺伺尤爲可虞若僅令東軍分段認
守設因兵單誤事雖悔何及劉長佑旣稱梟匪悍賊多半受傷勢
頗窮蹙早晚定可聚殲著該督懷遵前諭速將梟匪殄盡專力防
河以臻周密丁寶楨職任東撫責無旁貸仍著厚集兵團將山東
河面加意嚴守毋稍鬆勁儻防範稍疏致令賊匪偷渡必惟該撫
是問武定一帶河面距津較近著崇厚添調津郡兵勇馳往協同
防守不可稍分畛域致誤事機李鴻章當遵奉前諭將黃運河防
通盤籌畫願運防尤宜兼顧黃防以佐直東之不逮本日據馬新
貽奏採買備賑米石已將抵津請飭剋期驗收等語所有浙省採

辦米一萬五千七百石零計已將抵津門著劉長佑轉飭天津道俟此項米船到時剋期驗收以便海船趕駛回南毋令遲滯將此由六百里各諭令知之○諭左宗棠奏捻逆竄入北山見籌剿辦情形一摺捻逆經官軍逼入北山勢必由鄆洛上竄延綏該處荒瘠殊甚非賊所注意恐藉此東趨晉省山西西路沿河一帶在在與陝毗連防務喫緊轉瞬河流冰凍尤爲可慮著趙長齡督飭在防將士扼要嚴守並飭令陳湜相機兼顧沿河船隻悉行提歸東岸毋稍疏忽賊騎儻渡河而東則蔓延縱橫勢將靡所底止豈劉松山郭寶昌兩軍所能殄盡晉省爲畿輔屏翰左宗棠當如何力籌兼顧陝省兵力不爲不厚總當就地殲除不可以驅賊出境卽爲了事儻任賊東渡闌入晉疆惟左宗棠是問劉厚基一軍兵力尙單截賊恐未盡得力左宗棠庫克吉泰喬松年劉典當熟商機

宜妥籌調度潼商一帶亦宜嚴密布置以結捻逆回撲由此出關
邠涇一路並著分撥得力將士加意嚴防毋任賊由西南竄出繞
逸川鄂蜀省北路及楚北襄鄖一帶著駱秉章李瀚章等各添兵
勇分路扼守以固邊境將此由六百里諭知左宗棠駱秉章庫克
吉泰李瀚章喬松年並傳諭劉典何璟知之○己亥卯刻有星流
入翼軫○諭軍機大臣等前因捻匪竄撲黃防曾經諭令李鴻章
丁寶楨派兵實力防剿以杜北竄本日據毛昶熙奏稱聞東境官
軍失利捻股北趨逼近山東省城距黃河不滿百里梟匪見竄大
名一帶相去非遙恐勾結捻匪渡河爲患見在剿捻各營淮軍以
劉銘傳爲最豫軍以宋慶爲最皖軍以程文炳爲最請飭該三軍
剋日北向繞出賊前迎頭截剿如慮運防兵單宜增調江淮水師
以資分布各等語刻下節交冬令深恐河冰凍結捻逆乘機竄渡

自應以嚴防北竄爲要著該侍郎既稱劉銘傳等三軍最爲得力著李鴻章丁寶楨商酌情形妥籌調派該大臣等總當和衷共濟力顧根本速派大枝勁旅馳赴河岸繞前截剿以固畿疆門戶儻有一賊渡河必惟該督撫等是問梟匪見在直東交界並著丁寶楨飭令防軍會合直軍夾擊毋任與捻匪句合致滋貽誤毛昶熙所陳增調江淮水師等情並著李鴻章酌量辦理將此由六百里各諭令知之○諭麒慶奏逸匪彌勒僧格復出滋擾見派弁兵往剿一摺匪首彌勒僧格白凌阿係糾眾疊經搶劫久逸未獲之犯見在彌勒僧格復與匪徒任義潰聚集多賊在清河門一帶搶擄經朝陽縣兵勇往拏該匪等向東北逃逸竄至建昌縣屬之包格圖地方聚至數百人搶劫舖戶並有糾約白凌阿復出爲首之說該匪等出沒之區在建昌朝陽兩縣交界地方與敖漢及土默特

旗均相毗連。麒慶見已，揀派弁兵馳往查拏。著卽嚴督派出兵弁，與地方文武實力剿捕，並著都興、阿選派得力弁兵馳往交界處，所協力堵剿。其卓索圖、昭烏達兩盟亦著理藩院星速飭令該盟長等轉飭蒙古各旗認真揀派各旗員帶兵一體兜拏，不得稍分畛域，互相推諉。自干咎戾。此係著名要犯，都興、阿麒慶務當重懸賞格，設法擒獲，不准再任漏網。在事弁兵有能擒斬首犯者，卽著奏請破格獎勵。蒙古旗員兵丁一體辦理，以資鼓舞。奉省寶圖旗匪民程廣學有糾眾與該旗蒙古接仗滋擾，並竄撲朝陽情事，都興、阿麒慶當速飭弁兵會同剿滅，毋得玩愒致滋蔓延。將此由四百里各諭令知之。○諭伊勒屯奏哈密見無大員鎮撫，請飭催文麟赴任一摺。前據文麟奏行糧等項諸形缺乏，業經籌辦糧餉於七月初六日親自拔營前進。何以至今未抵哈密，殊不可解。文麟

自簡放辦事大臣以來催令赴任不啻至再至三乃竟百端藉口堅不肯前不知是何居心著卽剋期進發不准片刻逗留儻敢仍前玩忽必治以應得之罪並著成祿查明文麟行抵何處飛速咨催若再遷延卽著奏聞懲辦成祿圍攻肅州愈久愈疲似此泄沓從事何日是出關之期著趕緊整頓士馬迅將肅城攻拔振旅出關與文麟聯絡以壯聲威景廉是否啟行前經諭令穆圖善飭赴新任著景廉迅卽赴哈密接印任事以重職守毋得遲延干咎穆圖善亦不准藉端奏畱再行瀆請將此由五百里各諭令知之○庚子諭軍機大臣等崇厚奏黃防喫緊遵旨會籌防守一摺南路梟匪被剿窮蹙竄入東省赴傳振邦行營乞降崇厚與劉長佑會商以該匪全股投誠軍務戢事卽可騰出兵力兼顧黃防擬卽抽撥劉景芳陳濟清兩軍齊赴齊河下游武定所屬濱州等處口岸

設防惟該匪乞降後有無反側並傳振邦見在如何安插之處著劉長佑崇厚查明據實具奏前以該匪反覆無常諭令劉長佑不可遽行收撫此時勢蹙投誠難保不心懷叵測故作緩兵之計且首鼠兩端肆行搶掠均屬意中之事賊數本已無多自應痛加剿洗以絕根株著劉長佑丁寶楨崇厚督飭官軍會同接捕悉數殄除毋得率行收撫致貽後患黃防極關緊要轉瞬河流冰泆尤須節節設防前已諭令李鴻章將黃防通盤籌畫以佐直東之不逮其應如何迅撥重兵嚴加扼守之處仍著李鴻章劉長佑丁寶楨崇厚懍遵前旨妥籌布置毋稍疏虞將此由六百里各諭令知之○壬寅李鴻章奏據濟南府知府稟報捻逆沿河窺伺被守河礮船轟擊於十月初九初十等日悉向青州竄走濟屬已無賊蹤計劉銘傳一軍正由穆陵關北來當可迎頭攔擊潘鼎新十四日行

過肥城聞賊又東竄折由泰安東向若賊盤旋青境卽由博山臨
胸前進會商劉銘傳合力兜剿若賊被擊南下卽由新泰蒙陰南
進沂莒截剿鼎軍馬隊過少飭提督唐仁廉所部仁字三營並親
兵馬隊馳往泰安與潘鼎新會合提督郭松林武毅等營帶赴濟
甯與提督楊鼎勳所部勳開各營會合續進楊鼎勳分守濟甯南
至石佛一帶周盛波周盛傳分守韓莊八牖一帶鄭國魁等分守
大泛口至灘上一帶劉銘傳畱各營二成隊分守灘上至貓兒窩
一帶李昭慶劉秉璋移守六塘河與漕浙皖南等軍聯紮以固清
淮門戶臣又令李昭慶以四營仍紮運西原段以四營渡運斜紮
六塘河十餘里至詹家莊劉秉璋所部全移六塘河至白草溝與
各軍分守臣忝任專征責望交集既不敢自恃運防又不敢緩於
兜剿因令劉銘傳善慶等分帶馬步各隊出剿郭松林楊鼎勳各

軍酌畱數營防守濟甯至石佛河牆仍帶大隊會剿見除畱守運
牆外計有三大枝游擊之師劉銘傳潘鼎新各爲一枝郭松林楊
鼎勳併爲一枝每枝均及萬人總須躡賊所向合力剿辦隨時兼
護運防安徽撫臣英翰所派程文炳方長華一軍臣商令進紮郊
城相機截擊惟北路黃防關繫尤重臣爲運防所牽不能兼顧聞
直隸山東防河之軍共止一萬唐訓方張樹聲分駐齊河張秋北
岸人數稍單前准直隸督臣劉長佑咨稱東省范縣以下曾經奏
明劃歸東軍防守今夏始調直軍兼防見因梟匪未靖請仍將范
縣以下酌撥東軍協守查黃防自張秋至利津海口八百餘里今
議河北沿岸增防既恐無此兵力莫若令東軍大隊於冬臘正三
箇月專駐濟南至青州一路以防爲剿過正月後仍令隨處追擊
蓋賊欲北竄必由青濟始能偏近河岸黃河下游以濟南青州爲

門戶若以東軍二萬分駐校巡賊來迎擊賊去勤操不獨有神大局且可練成勁旅賊知南岸有備自不敢乘虛直突臣所派遊擊各軍屆時當緊躡賊蹤自北而南節節兜剿爲遮蔽黃運兩防之勢上諭軍機大臣等捻匪由濟南折向青州李鴻章見派劉銘傳潘鼎新等軍分路進剿著卽飭令該統將等與丁寶楨所部各軍聯絡聲勢四面兜剿以期痛挫賊鋒至黃運兩處防兵厚薄懸殊李鴻章身任統帥均應兼顧不得專事防運而置黃防於不問且黃運固宜嚴防追剿尤宜盡力該大臣另籌劉銘傳等三大枝兵爲遊擊之師每枝均及萬人兵力不爲不厚果能自北而南節節兜剿爲遮蔽黃運兩防之勢是卽以剿爲防乃劉銘傳等軍追賊數月從未獲一大捷似此有名無實賊匪何日殄滅著李鴻章嚴申號令責令該統將等實力追剿但令處處迎頭截擊不使竄

近黃河附近處所則河防自可無虞如敢仍前玩泄卽著嚴行參辦以肅軍律所稱令東軍大隊於冬臘正三箇月專駐濟南青州一路梭織巡防賊至迎擊爲黃河南路屏蔽等語丁寶楨所部遇有省南附近軍情緊要之時亦宜相機進剿豈能畫疆自守僅遇賊蹤併趨黃岸東軍力難堵禦李鴻章尤當速爲援應總之南北兩路河防該大臣等必當互相策應和衷共濟不可偏執已見致誤全局李鴻章原摺著鈔給丁寶楨閱看另片奏請將吉林黑龍江官兵病故遺骸於彙送回旗時飭令沿途地方官撥兵護送並准在營官兵附文往來遞寄家書等語著兵部行文各省督撫並吉林黑龍江將軍及各該城都統准照辦理將此由六百里各諭令知之○諭張凱嵩奏請調粵軍入滇隨征一摺滇省軍務緊要張凱嵩見擬募勇前進恐新集之軍難期得力請調廣西駐防慶

遠之何元鳳所帶元字三營駐防梧州之盧殿清安勇兩營赴滇助剿著蘇鳳文察度情形該處如可撤此兩軍赴調卽著飭令該二員統帶所部與張凱嵩新募粵軍由貴州都勻一帶探明路徑取道入滇以資臂助如尙需兵防剿卽著另派得力之軍換防以便該二員迅速由粵入滇不得稍有推諉張凱嵩另片奏因病請假調治等語著賞假一箇月准其暫住巴東調理該督奉命入滇爲時已久豈得再行遷延如醫調稍愈卽當趨程前進懍遵疊次諭旨妥籌辦理以副委任將此由五百里各諭令知之○馬新貽疏薦知府譚鍾麟等召來京並諭各省督撫察訪屬員據實保薦○癸卯諭軍機大臣等前任陝甘總督楊岳斌浙江提督鮑超從前辦理軍務素著功績均因患病開缺調理國家需才孔亟如該二臣者若令投閒置散殊爲可惜著駱秉章劉峴察看楊岳斌鮑

超曾否調治就痊如果病體已愈卽著迅速奏聞將此各諭令知之○諭成祿奏官軍移營扼紮情形暨催解皮衣另調各員等摺片新疆到處糜爛亟盼大枝勁旅早日出關爲各路聲援疊次催令成祿攻拔肅州剋日出關乃該提督忽稱合圍忽稱兵單餉絀百端藉口希圖宕延此次又稱合圍周弔王仁和黃祖淦等軍同心殺賊果如所奏肅城可有克復之機著卽嚴督各將士銳意進取迅速攻拔整頓出關儻再事遷延定將成祿重治其罪前諭四川先籌銀十萬兩限兩月解到成祿軍營見在解到之銀爲數甚屬寥寥著該部嚴催駱秉章趕爲撥解以濟飢軍肅州邊地寒冽士卒無衣禦寒殊形苦累甘涼安肅所屬各州縣攤派無面大皮襖統一萬五千件著穆圖善嚴催各屬如數購辦解營以濟急需知府佑昌隨營出關旣難得力著穆圖善另委一員迅赴成祿軍

營接辦糧臺事務平涼縣知縣徐楊文保並著該署督飭赴成祿軍營以資差委成祿另片奏高臺金塔解圍案內各員再請恩施等語此案於三月初二日諭令成祿將出力各員暫行存記俟肅郡克復後彙案保獎見在肅州未復該提督何得先行瀆請著仍遵前旨辦理將此由六百里各諭令知之○諭蘇鳳文奏擊退龍州逆匪乘勝進剿並請將文武各員懲處各一摺龍州匪首彭沅隴等糾黨窺撲太平郡城經蘇鳳文督飭鎮道各員疊次進剿攻破賊巢擒斬匪首多名郡城解嚴辦理尙妥仍著迅飭該員弁奮力進剿將龍州窩頭等處賊匪早日蕩平以除邊患在事出力員弁著蘇鳳文擇尤保獎毋許冒濫總兵李士恩剿辦吳逆股匪規取大虎巖正在相機進擊之際突有哨長韋日新戕官通賊情事該總兵移營退紮幾爲賊乘庸懦無能已可概見其平時募勇輕

率更恐有侵餉貽誤情事記名總兵李士恩著卽行革職提省查訊如有前項情弊卽著從嚴參辦其見存部勇旣經蘇鳳文責令覃遠璉派員接管卽著飭令該道員認真整頓俾成有制之兵覃遠璉有統領之責於哨長戕官通賊疏於防範亦難辭咎著摘去頂帶拔去花翎以示薄懲哨長韋日新侵蝕銀兩膽敢挾嫌將羅合盛刺殺密令叛黨勾賊應援實屬罪不容誅著趕緊查拏正法以申軍律一面檄飭覃遠璉督軍將大虎巖踞匪殲除進兵歸順州節節掃蕩毋任遷延將此由四百里諭令知之○諭丁寶楨賑恤山東被水災民○于廣西被戕遊擊羅合盛祭葬世職○甲辰諭軍機大臣等前因麟興等奏遵議安插索倫人眾請飭豫籌餉銀當經諭令戶部議奏茲據奏稱此項人眾令在科南之布爾滾地方暫爲棲止旣無專餉可供又無舊業可復自應籌撥銀兩以

資生計前定新疆月餉九萬五千兩除酌撥庫克吉泰等軍營二萬五千兩外尙有七萬兩擬於此項內劃撥銀五萬兩以備應用等語著麟興榮全錦丕勒多爾濟李雲麟奎昌明瑤於前項餉銀解到時照數劃撥會同籌畫妥爲布置並著裕瑞桂成遇有各省解到新疆月餉卽速陸續轉運毋稍遲誤惟此項索倫人眾若以數萬餉需供一時之飽暖苟延目前後將何繼該將軍等親歷邊疆情形較爲熟悉務將此次所撥餉銀五萬兩或購覓牛羊以爲游牧之計或開墾荒廠以爲耕種之區總須覈實動用使該人眾有久遠生業可依方爲妥善其如何籌辦情形卽著詳細查明妥議章程奏明辦理至布爾滾地方是否可以久駐此外能否另有安插之處並著一併奏聞將此由六百里各諭令知之○諭穆騰阿奏探明匪眾乞降旋叛情形一摺梟匪在山東館陶地方赴提

督傳振邦軍營之降本月十九日仍由館陶竄往夏堡寺東南一帶復行叛亂至威縣之白古寺經劉景芳所部追勦殲斃甚多賊向威縣迤西竄去穆騰阿見擬合隊進剿著卽檄飭劉景芳覘賊所向迎頭掩擊不可徒事尾追劉長佑近駐趙州與威縣相距不遠該匪若由威縣再竄變趙勢必搶渡滹沱所派李昌運一軍未免單薄該督務當添調勁旅會同剿捕以期迅殄賊氛穆騰阿另片奏侍衛薩凌阿不治眾情難期得力等語該員如實有劣蹟著該都統查明據實參奏如僅因防守不甚得力卽著飭令回京其所部交富山管帶以資統率將此由四百里各諭令知之○諭文麟奏行抵玉門通盤籌備情形請飭撥軍火帳房副將蕭青雲請旨革職各摺片文麟於八月初二日督率後起馬步自高臺啟行十五日已抵玉門著卽激勵將弁相機前進惟軍餉萬分缺乏器

械鍋帳均須添製待用尤迫而烏里雅蘇台所撥之餉迄今數月
尙未解到著麟興榮全錦丕勒多爾濟李雲麟將從前指撥餉銀
趕緊如數籌措交迎提委員迅解文麟軍營以濟眉急文麟應辦
軍裝皮襖後路糧運及目前餉需等項既難在哈密就地設措而
遇事咨商陝甘總督又恐緩不濟急文麟擬請將西安敦煌玉門
三處暫歸該大臣節制以期呼應較靈自不得不從權辦理卽著
照所請行穆圖善務當飭令該州縣於文麟應辦一切事宜認真
經理毋得遲延推諉致誤戎機一俟軍務稍鬆仍復舊章以示限
制文麟自蒙古台馳遞摺報等件屢有遲誤著卽照所請由北路
蒙古臺站巴里坤一帶往來接遞麟興榮全錦丕勒多爾濟伊勒
屯務節各臺站遵照辦理以期迅速肅州逆匪分竄玉門等處意
在阻截文麟進兵之路著成祿懷遵疊次諭旨迅克肅州疏通道

路俾利師行文麟所部軍火帳房均形缺乏著麟興榮全錦丕勒多爾濟李雲麟在於庫儲內分撥五子礮二十尊擡槍八十桿檯礮四十桿鳥槍二百桿帳房二百架火藥一萬斤噴筒火彈火箭量爲多撥務須星速照數解運以利攻剿副將蕭青雲擾民侵餉險詐妄爲著卽行革職仍責令戴罪自效如再怙惡不悛卽在軍前正法以肅軍律近日文武各員皆以新疆爲畏途一經指調率皆推諉不前嗣後遇有指調出關人員儻有藉詞規避應如何議定處分以杜取巧之處著吏部兵部妥議章程具奏景廉見在行抵何處著穆圖善等催令趲程前進迅赴新任將此由六百里各諭令知之○乙巳總理各國事務衙門奏美國使臣蒲安臣處事和平洞悉中外大體得旨著卽派往有約各國充辦理各國中外交涉事務大臣○追予江蘇陣亡知縣卞乃繩建祠○丙午諭軍

機大臣等穆騰阿奏賊勢日熾請撥東省馬隊追剿並賊股已渡
滹沱河各摺片覽奏曷勝焦急賊騎僅百餘名劉長佑所部兵勇
不爲不多乃剿辦日久不但不能殄滅反令增至五六百騎似此
玩延貽誤任令賊蹤縱橫奔突來往自如裹脅日眾勢將何所底
止東省捻股時思竄渡黃河設令梟匪勾結蔓延畿輔重地何堪
設想劉長佑督辦此股愈久愈疲此次姑從寬典儻再日久無功
該督自問當如何懲辦毋謂寬典長可幸邀也懷之愼之傳振邦
統兵防堵直東交界處所不思剿辦賊匪輒敢輕率受降屢經諭
令迎擊不可招撫乃竟顛倒荒謬爲賊所紿實堪痛恨著丁寶楨
嚴檄該提督並東省地方文武實力堵剿儻敢再蹈覆轍卽著嚴
參治罪余承恩所部勇丁旣不得力且恐有與梟匪勾串情事劉
長佑當嚴飭該總兵認真稽查不可專任該總兵以剿賊之事致

誤大局吉林黑龍江馬隊到京者爲數無多尙未整練穆騰阿請
派此項官兵前往剿賊應毋庸議該都統見擬統帶威遠等隊前
往進剿本日已諭令神機營另派京營兵丁前赴附京一帶更替
駐防俟此項兵丁到防時卽照穆騰阿所擬將見駐防所各兵帶
往前敵與劉長佑所部合力兜擊並著劉長佑於滹沱河迤南擇
要布置以杜回竄劉景芳一軍尙能得力著劉長佑飭令該總兵
與穆騰阿隨時策應聯絡進剿毋得稍分畛域穆騰阿原摺片各
一件均著鈔給劉長佑閱看將此由六百里各諭令知之○諭駁
秉章奏番夷出巢滋擾當經官軍擊退一招越嚮生番勾結馬邊
夷匪竄至距雷波廳百餘里之谷堆地方經駱秉章檄飭兵練土
司等前往會剿併力將夷匪擊退敗遁老巢仍著飭令該廳文武
各員嚴加防範毋使此擊彼竄將此諭令知之○以剿匪無功輕

率受降擒直隸總督劉長佑前任雲南提督傅振邦頂帶○丁未諭軍機大臣等英翰奏皖軍進抵郟城就地兜剿一摺捻匪紛擾山東濟南一帶趨向靡定李鴻章已派劉銘傳等三大枝兵分路追擊惟賊騎飄忽必須多備遊擊之師實力兜剿方可杜其奔突英翰前派程文炳一軍入東助剿尙能力顧大局該軍見既進抵郟城卽著檄令聽候李鴻章調度與淮軍聯絡策應合力截剿不得各懷觀望致誤戎機該逆南北奔竄其意總思乘閒搶渡運河所有皖軍分防河岸仍當飭令嚴密扼守不得以賊蹤偶遠稍涉懈弛將此由四百里諭令知之○己酉諭軍機大臣等穆騰阿奏梟匪搶過滹沱河剽疾北竄衍秀奏易州鄰境已有馬賊請飭督臣追剿各一摺梟匪於十月二十四日竄至保定迤西旋由容城西北折而東北穆騰阿督率各軍由北河驛跟剿卽著嚴檄劉景

芳及河間練軍合力接捕務將此股醜類就地殄除昨據劉長佑奏該匪供稱欲出口逃生該督當懷遵前旨與穆騰阿剋期兜擊毋得縱令逸出邊外致剿辦更難著手匪蹤極爲剽疾難保不由東固等處旁竄青滄一帶再由舊路肆擾著崇厚檄飭官軍嚴密防剿遇賊卽擊以遏狂氛該匪竄至滿城安肅一帶係與易州接壤陵寢重地關繫尤爲緊要衍秀已酌派兵勇相機防堵卽著不動聲色妥爲布置遵薊一帶係出口之路且與古北口相近亦不可不妥籌扼截著鄭魁士派撥所練兵勇視賊所向會籌掃蕩薊州與馬蘭鎮相距非遙著寶珣先事防維毋令匪蹤擾及附近處所劉長佑親督各軍剿匪遷延日久賊勢愈張見在該匪馬賊增至七八百人步賊增至三四百人儻再粉飾養癰任令徧擾畿疆或震驚陵寢地面劉長佑自問當得何罪本日據神機營奏

遵撥擡槍隊四百名交參將德元帶往霸州防守排槍四百名交
護軍參領英廉帶往任邱更替內火器防守聽候穆騰阿調遣等
語卽著飭令迅速啟程以資厚集惟直隸兵力尙屬不敷兜剿應
如何再行添調官兵於近畿一帶分路扼堵之處著神機營酌度
辦理將此諭知神機營並由五百里諭知劉長佑穆騰阿崇厚寶
珣行秀並傳諭鄭魁士知之○李鴻章奏捻逆大股東竄青州連
擾樂安壽光因濰縣有糧可掠盤踞三日臣先飛飭劉銘傳一軍
由沂水繞出穆陵關迎頭攔截劉銘傳聞賊尙在安邱濰縣一帶
飽掠卽派參將陳鳳樓率勇偵探逆賊截擊擒獲多名劉銘傳恐
該逆聞風潛遁督軍於十一月十七日黎明至臨河寨見賊踞松
樹山一帶馬步延互數十里劉銘傳分軍三營迎擊直擣賊巢將
松樹山以西賊館十餘處賊眾二千餘名全數撲滅擒斬賊目多

名維時任賴各逆率馬步賊五千餘名分由東南兩路擁至劉銘傳自督中左各營東拒任逆派陳振邦唐定奎兩軍南擊賴逆賴逆不敢接戰率黨回奔任逆踞牟山頂經善慶等猛擊劉克仁等率隊繼進賊向牟山東奔我軍追逐數里任逆復糾牛逆步賊數千併力回拒劉克仁等率軍追至大戰任牛兩酋亦不敢拒戰驀過汶河向安邱城北竄走劉銘傳督各軍由汶河南岸跟追當任賴兩逆兩路猛撲之時賴逆不戰先潰竄往牟山之南爲大軍所隔不得與諸逆合股任牛二逆潛由安邱城西與賴逆合劉銘傳指揮步軍抗拒任逆又派陳振邦等迅帶馬隊合擊賴逆進至東嶺賴逆所部已逃去大半僅賸步賊千餘經馬隊四路鈔擊擒斬殆盡生擒賊目數名任牛各逆見勢不支亦繞至安邱東北由高密諸城一路南竄查擒逆此次竄擾濰縣難保不折回青濟窺伺

黃防經劉銘傳間道繞前痛擊三戰皆捷賴逆一股被創略盡潘鼎新自肥城改由泰安東向經臣飭由博山臨朐出穆陵關計已與銘軍會合追剿該逆大創之餘必從諸莒直趨海韻南路運防又形喫重郭松林武毅一軍整練已齊來濟候調臣飭該提督與楊鼎勳所部勦開各營合爲一路取道沂郯探賊所向與劉銘傳程文炳等合力兜剿上諭捻股自東竄青州後復在安邱濰縣一帶盤踞搶掠經劉銘傳督軍馳至三戰皆捷賴逆一股挫斬殆盡任牛各逆敗向高密諸城一路南竄數月以來獲此勝仗稍足以振軍威所有此次出力員弁准李鴻章擇尤彙案保獎毋許冒濫賊匪初受大創其氣漸餒官軍當乘此聲勢痛加剿洗略一鬆勁則賊匪養成銳氣剿辦又難李鴻章見已飭潘鼎新一軍會合劉銘傳追剿而令郭松林楊鼎勳合軍一路取道沂郯探蹤前進

期與劉銘傳程文炳等合力兜擊卽著嚴飭各軍奮勇齊進務將此賊聚而殲旃丁寶楨亦當督率所部隨時策應不得稍存膜視賊若由諸莒直趨海贛南路運防關緊要李鴻章當先期布置以遏狂氛毋稍大意另片奏知縣藐法逞兇請革職等語劉銘傳在安邱接仗後派令遊擊宇文建進城購辦軍糧業經知會何以城上復行開槍將該遊擊轟斃並誘擊都司劉長進等搶去馬匹衣物又將入城曉諭之人鎖押並銃傷官兵四人是否劉銘傳所部將士另有騷擾地方滋生事端之處抑實係該官民等藐法逞兇安邱縣知縣李舒翹著卽革職擊問交丁寶楨督同臬司嚴行審辦勒令將開槍戕官及誘擊弁兵搶擄馬匹衣物各犯交出秉公審訊按律定擬具奏正在寄諭閒據丁寶楨奏擊賊獲勝情形一摺王心安等軍連日追賊在濰縣地方將賊擊敗向東南

奔竄與李鴻章所奏賊情大略相同丁寶楨恐賊由諸莒竄擾西路已飭王正起等盡力窮追偏賊南竄該撫因西路黃防喫重擬馳由省城察看濠口利津一帶河道卽著會商李鴻章妥爲布置悉心辦理事竣卽趕緊回營督軍剿賊仍一面嚴飭楊飛熊等探明賊蹤與李鴻章派出之軍協力會剿毋稍延誤丁寶楨另片奏梟匪乞降復竄各情前據穆騰阿奏到已將傅振邦摘去頂帶稍示薄懲如遇賊匪再行竄近東境丁寶楨務飭該提督會合直軍盡力追剿不准遷延貽誤將此由六百里各諭令知之○諭左宗棠等奏捻逆竄入北山分股狂奔官軍截剿疊勝並各軍剿回獲勝甯州解圍正甯等縣甫失旋復情形各一摺捻逆由鄜州境折向洛川經提督劉厚基連番追剿突圍劉厚基營盤劉厚基出隊擊退遂分竄甘泉擾及宜川縣雲巖鎮等處其西路捻股勾結回

逆攻犯耀州州城及竄近同官縣各地方亦經提督劉效忠等分
馳掩擊斃賊甚多見在劉厚基等由宜川洛川等處分路前進正
可乘此聲威痛殲醜類著左宗棠庫克吉泰喬松年劉典嚴檄劉
松山等各率所部分投剿截使該逆不得喘息就地殄除惟捻蹤
飄忽靡常鄜延所屬各邑在在與晉毗連轉瞬冰橋凝結難保其
不合併東趨過河犯晉左宗棠等仍當懷遵疊次諭旨督飭各營
將士實力堵扼毋任闌入晉疆更形延蔓甘肅回逆攻撲甯州州
城都司李廣珠出奇擊賊追斃多名甯州得以解圍涇州一帶踞
回復經張在山分剿獲勝正甯寶雞兩城失陷譚玉龍楊和貴等
先後分道援剿旋經收復此次回匪疊爲官軍摧挫其餒漸衰左
宗棠等飭知雷正綰張在山等分督各軍相機進剿以期早靖逆
氛陝甘回患已深自應隨時變通辦理左宗棠等呈遞曉諭回民

分別勦撫告示兩件尙合機宜著卽廣行張示以清反側將此由
六百里諭知左宗棠章克言秦喬松年並傳諭劉典知之○予山
東被戕遊擊宇文建陝西陣亡副將周萬祥等祭葬世職